

Mick Antoniw AS/MS
Y Cwnsler Cyffredinol a Gweinidog y Cyfansoddiad
Counsel General and Minister for the Constitution



Eich cyf/Your ref: CG/PO/296/2023
Ein cyf/Our ref: CG/PO/296/2023

Llywodraeth Cymru
Welsh Government

Huw Irranca-Davies AS
Cadeirydd
Y Pwyllgor Deddfwriaeth, Cyfiawnder a'r Cyfansoddiad
Senedd Cymru

4th Medi 2023

Annwyl Huw

Diolch am eich llythyr dyddiedig 24 Gorffennaf mewn perthynas â'm hymddangosiad yn y Pwyllgor Deddfwriaeth, Cyfiawnder a'r Cyfansoddiad ar 10 Gorffennaf. Croesawais y cyfle i siarad â'r Pwyllgor. Rwyf wedi darparu ymateb manwl i'ch cwestiynau pellach mewn Atodiad i'r llythyr hwn.

Mick Antoniw AS/MS
Y Cwnsler Cyffredinol a Gweinidog y Cyfansoddiad
Counsel General and Minister for the Constitution

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Mick.Antoniw@llyw.cymru
Correspondence.Mick.Antoniw@gov.Wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Atodiad

1) Sut bydd y Senedd yn gallu craffu ar y gwaith y mae'r Fonesig Vera Baird yn ei wneud fel cynghorydd arbenigol annibynnol ar ddatganoli cyfiawnder?

Penodwyd y Fonesig Vera Baird CB i oruchwyllo'r broses o ddylunio a gweithredu'r cynllun gwaith ar gyfer paratoi i ddatganoli cyfiawnder. Mae ei rôl yn bennaf yn cynnwys rhoi cyngor i Lywodraeth Cymru a'n helpu i ddod o hyd i'r ffyrdd gorau o gyflawni ein gwaith polisi parhaus i baratoi ar gyfer datganoli cyfiawnder. Felly, mae ei rôl yn un ymgynghorol gan fwyaf ac nid yw'n rhywbeth y gall y Senedd graffu arno'n rhwydd. Fodd bynnag, gallaf roi rhywfaint o sicrwydd bod y gwaith y mae'n ei wneud yn cael ei oruchwyllo gennyf fi, y Gweinidog Cyfiawnder Cymdeithasol a'r Prif Chwip a grŵp o uwch-swyddogion. Yn ogystal â hyn, mae eitem sefydlog ar baratoadau ar gyfer datganoli cyfiawnder ym mhob Is-bwyllgor y Cabinet ar Gyfiawnder lle mae'r Fonesig Vera yn rhoi'r wybodaeth ddiweddaraf am y cynnydd a wneir ar y cynllun gwaith datganoli cyfiawnder. Mae cofnodion y cyfarfodydd hyn yn cael eu cyhoeddi wrth gwrs.

Bydd y Senedd yn gallu craffu ar gynigion Llywodraeth Cymru ynglŷn â sut i fwrw ymlaen ag elfennau o ddatganoli cyfiawnder gan y byddant yn cael eu cyhoeddi ar gyfer ymgynghori yn eu cylch. Bydd y rhain yn cael eu llywio gan gyngor y Fonesig Vera, yn ogystal â chan ddarnau eraill o waith sy'n cael eu gwneud yn benodol ar ddatganoli cyfiawnder ieuencid a'r gwasanaeth prawf, y cyfeiriais atynt yn fy natganiad llafar ar 27 Mehefin. Nid yw'r Fonesig Vera yn gyfrifol am ymgymryd â'r gwaith i gynhyrchu unrhyw un o'r allbynnau hyn nac am ddrafftio cynnwys. Fodd bynnag, bydd ei rôl yn trafod ag arweinwyr prosiectau unigol, yn cynnig cyfeiriad ac yn rhannu ei phrofiad a'i harbenigedd yn cael effaith ar y cynhyrchion terfynol.

2) Roedd eich sylwadau yn ystod y cyfarfod yn awgrymu na ellir defnyddio'r broses datrys anghydfodau rhynglywodraethol mewn perthynas â Biliau unigol y DU sy'n gwneud darpariaeth mewn meysydd datganoledig oherwydd yr amserlenni sy'n gysylltiedig â Biliau o'r fath sy'n pasio drwy Senedd y DU. A yw hynny'n gywir? Os felly, sut y gellid datrys anghydfodau sy'n ymwneud â Biliau'r DU? Os na fydd anghydfodau'n cael eu datrys, pa effaith mae hyn yn ei chael ar y gyfraith a wneir i ddinasyddion Cymru mewn meysydd datganoledig?

Mae ffocws cychwynnol yr Adolygiad o Gysylltiadau Rhynglywodraethol ar osgoi anghydfodau. Rydym yn gweithredu yn yr ysbryd hwnnw. Pan fo gennym bryderon am ddarn penodol o ddeddfwriaeth y DU, rydym yn ceisio gweithio gyda Llywodraeth y DU yn y lle cyntaf i sicrhau bod ein safbwyntiau'n cael eu deall, a'r nod yw ei chael i gymryd camau priodol i ddatrys y mater.

Nid yw'n wir na ellir defnyddio'r prosesau anghydfod yn yr Adolygiad o Gysylltiadau Rhynglywodraethol mewn perthynas â Biliau unigol y DU; fodd bynnag, byddai'r amserlennu cysylltiedig yn debygol o fod yn gymhleth. Weithiau gall fod yn hwyr iawn yn hynt Bil cyn iddi ddod yn amlwg na ellir dod i gytundeb ar lefel rhynglywodraethol, ac er y gellir cynnal y prosesau anghydfod yn gyflym, nid ydynt yn diystyru gallu Senedd y DU i gynnal ac amserlennu busnes deddfwriaethol.

Rydym yn naturiol yn monitro rhaglen ddeddfwriaethol Llywodraeth y DU yn ei chyfanrwydd, ac yn parhau i uwchgyfeirio materion – mewn perthynas â Biliau unigol a materion trawsbynciol – yn ôl yr angen. Rwy'n argyhoeddedig bod amarch parhaus Llywodraeth y DU tuag at Gonfensiwn Sewel yn anfaddeuol ac yn gwbl amhriodol. Mae dinasyddion Cymru yn disgwyl yn briodol y bydd y gyfraith sy'n berthnasol iddynt yn cael ei gwneud mewn ffordd sy'n parchu confensiynau cyfansoddiadol y DU.

3) Pa mor bryderus ydych chi fod y defnydd cynyddol o Filiau'r DU i wneud darpariaeth (sylweddol ar adegau) mewn meysydd datganoledig yn gwthio i'r cyrion y cyfleoedd i'r cyhoedd a rhanddeiliaid yng Nghymru ymgysylltu â'r broses o wneud y gyfraith honno o ystyried y gweithdrefnau gwahanol sy'n bodoli rhwng y Senedd a Senedd y DU?

Rwy'n dal o'r farn y gall fod sefyllfaoedd pan fo'n synhwyrol ac yn fanteisiol i Filiau'r DU wneud darpariaeth ar gyfer Cymru. Fodd bynnag, rwy'n ymwybodol iawn o'r pryderon craffu cysylltiedig, ar gyfer y Senedd yn ogystal ag ar gyfer y cyhoedd ehangach a rhanddeiliaid. Yn anochel, ni fydd y Senedd yn craffu mor fanwl ar ddeddfwriaeth y DU ag ar ddeddfwriaeth a wneir yn y Senedd.

Am y rheswm hwn, rydym yn parhau o'r farn sylfaenol y dylid gwneud deddfwriaeth i Gymru yng Nghymru, yn unol â'r setliad datganol; a phan ystyrir bod deddfwriaeth y DU yn briodol (yn unol â'n hegwyddorion), rydym wedi ymrwymo i sicrhau cymaint o graffu â phosibl drwy'r broses Cynnig Cydsyniad Deddfwriaethol.

Rydym yn parhau i geisio gweithio gyda Llywodraeth y DU a'r llywodraethau datganoledig eraill i gryfhau ffyrdd o weithio a gwella ymgysylltiad Llywodraeth y DU â'i rhaglen ddeddfwriaethol, gan gynnwys parch at Gonfensiwn Sewel.

4) Sut ydych chi'n monitro pa gynigion deddfwriaethol mewn rhannau eraill o'r DU a allai gael effaith ar gyfraith Cymru o ganlyniad i Ddeddf Marchnad Fewnol y DU 2020? A ydych yn ymwybodol o unrhyw gynigion a allai gael effaith yn y dyfodol agos?

Rydym yn cynnal deialog reolaidd â'r llywodraethau datganoledig eraill i roi adborth ar gynigion a allai fod â goblygiadau o ran y Ddeddf Marchnad Fewnol, a chael adborth ar gynigion o'r fath. Mae ein rhyngweithio â Llywodraeth y DU yn fwy ysbeidiol a byddem yn croesawu cydweithio agosach â hi yn y maes hwn. Er bod Llywodraeth Cymru yn gwneud popeth o fewn ei gallu i fonitro'r cynigion deddfwriaethol gan Lywodraeth y DU, mae hyn yn aml yn ddibynnol ar lefel y rhyngweithio a geir gan Lywodraeth y DU.

Rydym yn ymwybodol o'r safbwynt a gymerwyd gan Lywodraeth y DU ynghylch Deddf Marchnad Fewnol y DU o ran cynllun dychwelyd ernes arfaethedig Llywodraeth yr Alban ar gyfer cynwysyddion diodydd ac rydym yn adolygu sut mae hyn yn effeithio ar ddylunio a gweithredu ein cynllun arfaethedig ein hunain.

5) Pa asesiad y mae Llywodraeth Cymru wedi'i wneud o sut y gallai cynlluniau a gyhoeddwyd yn ddiweddar i gyflwyno cyfyngiadau ar werthu cynhyrchion sy'n cynnwys llawer o fraster, siwgr a halen gael eu heffeithio gan egwyddorion mynediad i'r farchnad Deddf Marchnad Fewnol y DU?

Rydym wedi dechrau ystyried a fydd Deddf Marchnad Fewnol y DU yn cael unrhyw effaith ar y cynigion. Fodd bynnag, hyd nes y bydd cyfarwyddiadau polisi manwl wedi'u cwblhau ni allwn wneud asesiad manwl.

- 6) Yn eich datganiad ar 1 Gorffennaf mewn perthynas â Biliau y DU yn cael eu pasio heb gydsyniad y Senedd, gwnaethoch chi ddweud: “Dydy’r setliad datganoli erioed wedi bod dan gymaint o straen â hyn yn ystod yr holl amser ers ei sefydlu, 24 mlynedd yn ôl”. A allwch chi nodi pam eich bod yn credu bod hyn yn wir a pha gamau y mae Llywodraeth Cymru yn eu cymryd mewn ymateb?**

Mae Llywodraeth y DU yn ystod y blynyddoedd diwethaf wedi mabwysiadu dull sy’n sylfaenol amharchus a dinistriol tuag at Gonfensiwn Sewel, tuag at ddatganoli, a thuag at yr Undeb.

Roedd Deddf Cyfraith yr UE a Ddargedwir (Dirymu a Diwygio) 2023 yn enghraifft berffaith o’r agwedd hon – ni ellir dadlau yn rhesymegol fod achos eithriadol na brys dros gyflwyno’r Bil, ac eto parhaodd Llywodraeth y DU i symud ymlaen er gwaethaf diffyg cydsyniad y Senedd.

Rwy’n parhau i gyflwyno sylwadau i Lywodraeth y DU ar bob cyfle, gan nodi graddfa a natur ein pryderon ar draws ei rhaglen ddeddfwriaethol.

Rydym wedi gweld cynnydd mewn rhai meysydd, er enghraifft y cynnydd diweddar ar y Bil Ffyniant Bro ac Adfywio; fodd bynnag, mae llawer o waith i’w wneud o hyd. Rydym yn pwysu ar Lywodraeth y DU am wybodaeth cyn ei rhaglen ddeddfwriaethol nesaf a hynny cyn gynted â phosibl. Y bwriad yw sicrhau sylfaen synhwyrol ar gyfer gweithio rhynglywodraethol cadarn wrth inni symud tuag at y sesiwn Seneddol nesaf.

Rwyf hefyd yn ymwybodol iawn o rôl Tŷ’r Arglwyddi yn y maes hwn. Ymunais â sesiwn frifffio gyda’r Arglwyddi ym mis Ionawr i leisio ein safbwyntiau, ac rwy’n awyddus i barhau â’r cydweithio hwnnw. Rwy’n credu y dylai Llywodraeth y DU fynegi ei rhesymau dros faterion cydsyniad deddfwriaethol yn gliriach, ac ar gam cynharach yn y broses, er mwyn hysbysu’r Arglwyddi yn well a hynny gyda digon o amser.

- 7) Ym mis Ionawr eleni gwnaethoch chi ddweud wrthym nad oeddech yn gwybod am unrhyw amgylchiad ble y gofynnodd Llywodraeth Cymru i Lywodraeth y DU ddeddfu ar ei rhan. Ers hynny rydym wedi cael gwybod bod Llywodraeth Cymru wedi gofyn am gael ei chynnwys ym Mil Ardrethu Annomestig Llywodraeth y DU. A allwch chi egluro’n fanwl:**

- a. **y broses sydd ynghlwm â defnyddio Bil y DU mewn amgylchiadau lle mae cytundeb eang i wneud hynny: pryd fydd trafodaethau’n dechrau, pwy sy’n eu cychwyn, beth yw’r amserlenni, y broses ar gyfer cytuno ar welliannau ac ati.**
- b. **y prosesau cymeradwyo’n derfynol yng Nghabinet Llywodraeth Cymru ar gyfer defnyddio Biliau y DU drwy gydol eu hynt drwy Senedd y DU.**

Tynnodd y Gweinidog Cyllid a Llywodraeth Leol sylw at ein hymwneud â'r Bil Ardrethu Annomestig drwy ddatganiad ysgrifenedig ym mis Mawrth eleni, ymhellach i'r ymrwymiad a gynigiais yn fy llythyr i'r Pwyllgor hwn ar 30 Mehefin 2022.

Mae ymgysylltiad Llywodraeth y DU a phrosesau ac amserlenni Seneddol ar gyfer Biliau unigol y DU yn amrywio'n sylweddol. O ran y Bil Ardrethu Annomestig, roedd ymgysylltu swyddogol gan Lywodraeth y DU yn amserol ac yn effeithiol ar y cyfan, ac roedd yn cynnwys trafodaethau cyn cyflwyno'r Bil. Yn dilyn hynny, archwiliwyd gyda Gweinidogion y posibilrwydd o wneud darpariaeth ar gyfer Cymru drwy'r Bil.

Mae'r sefyllfa honno'n wahanol i'r broses gyda Deddf Banc Seilwaith y DU 2023, er enghraifft, na wnaethom argymhell bod y Senedd yn rhoi cydsyniad iddi yn wreiddiol pan y'i cyflwynwyd. Yn yr achos hwnnw, cafwyd ymgysylltiad a thrafodaethau sylweddol dilynol gyda'r bwriad o sicrhau darpariaeth addas i Gymru, a arweiniodd yn y pen draw at welliannau a'n galluogodd i argymhell bod y Senedd yn rhoi cydsyniad. Roedd honno'n broses hir, gyda'r gwelliannau perthnasol yn arwain at ein hargymhelliad i'r Senedd roi cydsyniad chwe mis ar ôl cyflwyno'r Bil.

Gellir cyferbynnu'r enghreifftiau hyn yn glir ag enghreifftiau eraill fel Deddf Cyfraith yr UE a Ddargedwir (Dirymu a Diwygio) 2023; pan fethodd y prosesau a'r trafodaethau â dal i fyny â hynt y Bil.

Ar lefel gyffredinol, mae Gweinidogion yn gwneud penderfyniadau ar gyfer eu meysydd mewn modd sy'n gyson â'n hegwyddorion ar gyfer Biliau'r DU, a chaiff y rhain eu rhannu â'r Senedd. Rwyf hefyd yn cael golwg ar y penderfyniadau hynny.

Mae sefyllfaoedd, fel y gwelwyd yn ddiweddar gyda'r Bil Gwarchodaeth rhag Aflonyddu ar sail Rhyw, pan fo angen ystyriaeth ehangach gan y Cabinet oherwydd materion penodol. Nid y Memorandwm Cyd-ddealltwriaeth ar gyfer cychwyn y Bil Gwarchodaeth rhag Aflonyddu ar sail Rhyw, y cytunwyd arno yn y pen draw, oedd ein safbwynt cychwynnol. Byddai ein hegwyddorion wedi gorchymyn bod pwerau cychwyn yn cael eu rhoi i Weinidogion Cymru. Fodd bynnag, ar ôl pwysu a mesur, gyda chonchesiynau gan Lywodraeth y DU a'r ystyriaeth ehangach o'n hegwyddorion ar gyfer darpariaeth fanteisiol i bobl Cymru, gwnaed penderfyniad ehangach mai argymhell cydsyniad oedd yr opsiwn gorau.

- 8) Wrth inni ystyried y memoranda cydsyniad deddfwriaethol ar y Bil Ardrethu Annomestig, gwnaethom nodi bod y Bil yn cael ei ddefnyddio i newid gweithdrefn graffu ar gyfer pŵer dirprwyedig a gymeradwywyd gan y Senedd ei hun ddwy flynedd yn unig yn ôl yn ystod hynt y Bil Llywodraeth Leol ac Etholiadau (Cymru) (Deddf 2021 erbyn hyn). A oes modd i chi roi eich barn ar ddefnyddio Biliau'r DU i wneud newidiadau i weithdrefnau craffu y cytunwyd arnynt yn neddfwriaeth y Senedd, a pha mor briodol yw'r dull hwn yn eich barn chi?**

Rwy'n ymwybodol bod y Gweinidog Cyllid a Llywodraeth Leol wedi darparu ymateb manwl i'r Pwyllgor ar 30 Mehefin.

Yn gyfansoddiadol, mae priodoldeb darpariaeth o'r fath yn cael ei gwneud mewn Bil y DU yn gysylltiedig yn llwyr â'r broses cydsyniad deddfwriaethol. Dyna pam y tynnir y mater hwn at sylw'r Aelodau drwy ein Memorandwm Cydsyniad Deddfwriaethol.

Os yw'r Senedd yn fodlon i ddarpariaeth o'r fath gael ei gwneud mewn Bil y DU, yna mae'n briodol. Os nad yw'r Senedd yn fodlon, yna dylai Llywodraeth y DU ddiwygio'r ddarpariaeth yn briodol.

Mae'r Bil Ardrethu Annomestig yn enghraifft o'r effeithiau cadarnhaol y gall Biliau'r DU eu cael pan fydd y broses gydsynio yn gweithio'n briodol. Cawsom ymgysylltiad da a'n galluogodd i osod ein Memorandwm Cydsyniad Deddfwriaethol o fewn pythefnos i gyflwyno'r Bil. Yn ei dro, galluogodd hynny i'r Senedd gael mwy o gyfle i graffu nag y gellir ei roi mewn achosion lle nad yw ymgysylltiad o'r fath wedi digwydd.

9) Mae'n ymddangos bod Llywodraeth Cymru yn dibynnu ar y weithdrefn 'cywiro cyn gwneud' yn fwyfwy aml wrth gywiro gwallau mewn is-ddeddfwriaeth. Pwy o fewn Llywodraeth Cymru, yn swyddogion neu yn Weinidogion, sy'n penderfynu a yw gwall mewn offeryn cadarnhaol drafft yn ddigon mân i'w gywiro cyn i'r offeryn gael ei lofnodi?

Roedd fy ngohebiaeth gyda'r Pwyllgor yn gynharach eleni ynghylch y mater hwn yn egluro natur y mân wallau, sy'n aml yn faterion atalnodi bach neu'n faterion teipograffyddol eraill, y mae'r broses gywiro sefydledig yn ymdrin â nhw. Fel yr eglurais, mae'r broses hon yn berthnasol i Offerynnau Statudol (OSau) Cymru, fel y mae i Offerynnau Statudol y DU a'r Alban a Rheolau Statudol Gogledd Iwerddon.

Mae penderfyniadau ar y materion hyn yn cael eu gwneud gan ystod o swyddogion (yn Llywodraeth Cymru yn ogystal â'r Cofrestrydd OSau os yw amser yn caniatáu) ac weithiau gan Weinidogion hefyd. Fodd bynnag, credaf fod y trafodaethau diweddar yn y Senedd yn nodi nad yw'n fater o'r Cofrestrydd OSau, cyfreithiwr neu aelod o'r Swyddfa Codau Deddfwriaethol yn Llywodraeth Cymru, neu Weinidog yn penderfynu a oes angen symud cromfach mewn Offeryn Statudol, ond yn hytrach y Senedd yn gwybod bod y cywiriad wedi digwydd.

Felly, rwyf wedi gofyn i swyddogion sefydlu dull ar gyfer sicrhau bod cofnod o gywiriad y bwriedir ei wneud neu gywiriad terfynol o wallau ar gyfer offerynnau cadarnhaol drafft yng ngoleuni adroddiadau'r Pwyllgor ar gael. Oherwydd, fel y nododd y Cadeirydd dros dro mewn dadl ddiweddar, mae'n bwysig bod y Senedd yn deall beth y gofynnir iddi ei gymeradwyo.

Byddaf yn ysgrifennu at y Pwyllgor ynghylch y mater hwn unwaith y bydd swyddogion wedi nodi dull addas i gefnogi hyn.

10) Pa feini prawf y mae Llywodraeth Cymru yn eu defnyddio, y tu hwnt i'r rhai a nodir mewn Ymarfer Offeryn Statudol, wrth ystyried a yw camgymeriad mewn is-ddeddfwriaeth ddwyieithog yn fân ac nad yw'n berthnasol?

Rydym yn cael ein llywio gan y canllawiau a amlinellais yn flaenorol i'r Pwyllgor yn fy ngohebiaeth gynharach ynghylch y mater hwn.

11) A yw Gweinidogion Cymru yn ystyried materion sy'n ymwneud â hygyrchedd cyfraith Cymru cyn cydsynio i Lywodraeth y DU wneud is-ddeddfwriaeth mewn

meysydd datganoledig? Os felly, pa feini prawf sy'n cael eu defnyddio i wneud asesiad?

Y safbwynt cychwynnol yw y dylid gwneud deddfwriaeth mewn meysydd datganoledig yng Nghymru, gyda hygyrchedd y gyfraith yn un o'r egwyddorion sy'n sail i hynny.

Bydd unrhyw benderfyniad i gytuno i ddarpariaeth gael ei gwneud mewn Bil y DU yn cynnwys dadansoddiad o amryw ffactorau, gan gynnwys hygyrchedd.

Byddai'r ffactorau hynny hefyd yn cynnwys manteision posibl cyflwyno darpariaeth mewn Bil y DU mewn sefyllfaoedd pan fo diffyg gwahaniaethau polisi.

Gall y rhain gynnwys adnoddau, eglurder a chydlyniant, pan fo, er enghraifft, materion datganoledig a materion a gedwir yn ôl rhyng-gysylltiedig cymhleth; neu ddarpariaethau technegol gyda goblygiadau trawsffiniol.

12) A allwch roi'r wybodaeth ddiweddaraf am gynlluniau Llywodraeth Cymru ar gyfer Bil Diddymiadau Statud?

Fel y nododd y Prif Weinidog yn ei ddatganiad deddfwriaethol diweddar, rhoddir yr wybodaeth ddiweddaraf am y Biliau cydgrynhoi yn fy adroddiad blynyddol ar gynnydd y rhaglen hygyrchedd. Bydd yr adroddiad hwnnw'n cael ei osod yn yr hydref, felly byddaf yn rhoi diweddariad llawnach ar y cynigion bryd hynny. Y bwriad ar hyn o bryd yw y bydd y Bil cyntaf o'r math hwn yn cael ei alw'n 'Bil Deddfwriaeth (Diddymiadau) (Cymru)'.

13) Nododd y Prif Weinidog yn ei ddatganiad ar y Rhaglen Ddeddfwriaethol y byddai Llywodraeth Cymru yn cyflwyno Bil cydgrynhoi ar gynllunio. A allwch roi'r wybodaeth ddiweddaraf inni ynghylch pryd y bydd y Bil hwnnw'n cael ei gyflwyno i'r Senedd?

Bydd diweddariad ar y Bil hwn hefyd yn cael ei roi yn fy adroddiad blynyddol sydd i ddod.